

**Aalisarnermut, Piniarnermut Nunalerinermullu Naalakkersuisoq
Landsstyremedlemmet for Fiskeri, Fangst & Landbrug
Minister of Fisheries, Hunting & Agriculture**



Inatsisartunut ilaasortaq Otto Jeremiassen, Siumut
MAANI

**Naalakkersuisunut apeqqummut nr. 40-mut akissut una pillugu
"Kangaatsiami, Ikerasaarsunni Niaqornaarsunnilu Royal Greenland-ip
tunisassiorfiutaasa siunissaat pillugu Naalakkersuisut qanoq
iluarsiiniarlarsaarpat ?**

Kangaatsiami, Ikerasaarsunni aamma Niaqornaarsunni tunisassiorfiit pillugit
Naalakkersuisunut apeqqutit Naalakkersuisoqarfimma 29. marts 2009 tiguaa.

**1) Kangaatsiami, Ikerasaarsunni Niaqornaarsunnilu Royal Greenland-ip
tunisassiorfiutaasa siunissaat pillugu Naalakkersuisut qanoq iluarsiiniarlarsaarpat ?**

- a) Tassami tunisassiorfiit pillugit suleqatigiisitaq suliaqartoq
oqaatigineqartarpoq, taannalu qanoq sivisutigisumik
ingerlanniarneqarnerpa ?
- b) Suut qanoq iliuusissat siunnerfiuppat ?
- c) Tunisassiorfiit matoqqatiinnarniarneqarpat, imaluunniit ammaqqinnissaat
siunertaangaluarpa?

1) pillugu. Ilisimaneqartutut Royal Greenland A/S 100 %-imik
Namminersornerullutik Oqartussanit pigineqarpoq. Kisiannili aktiaselskabit pillugit
inatsit tunngavigalugu ingerlatsisoqarpoq, aammalu siulersuisut
piginneqatigiiffimmilu pisortat ingerlatsineq akisussaaffigalugu.

Namminersornerullutik Oqartussat tunisassiorfinnik ingerlatsinermit
akiliuteqqusaanngillat akuliussinnaanatillu, taamaammallu aamma illoqarfinni
nunaqarfinnilu aalisakkanik tunisassiornermi ineriartortitsinissamut
pilarsarusiorsinnaanatik. Namminersornerullutik Oqartussat ataatsimeersuarnerit
aqutigalugit qulliunerusumik politikkit nalunaarutigisarpaat.

Suleqatigiissitaliortoqarnikuvoq, taassumalu Royal Greenland A/S-ip nunaqarfinni
tunisassiorfii misissorpai. Naatsorsuutigineqarpoq suleqatigiissitaliap
nalunaarusiaa aprilip naanerani naammassissasoq, taassumalu kingorna
Naalakkersuisuni suliarineqarluni. Naalakkersuisut aalajangeereerpata tamanna
Royal Greenland A/S-imut nalunaarutigineqassaaq.

a) pillugu. Suleqatigiissitaliap nalunaarusiami aprilip naanera naammassinissaa
naatsorsuutigaa.

b) pillugu. Iliuusissat suut siunnerfigineqarnerisut oqaatigitinnagu suleqatigiissitaliap
nalunaarusiaa inassuteqaataalu utaqqivakka.

J.nr. 01.28
2009-40
2. april 2009
Postboks 269
3900 Nuuk
Oq/tel +299 34 50 00
Fax +299 32 47 04
apnn@gh.gl
www.nanoq.gl

c) pillugu Royal Greenland A/S piginnittuummat taannalu tunisassiorfinnik taaneqartunik matusisuummat suut iliuseriniarneqavannersut oqaatigisinnaangilara, tassa Naalakkersuisut nalinginnaasumik ulluinnarni ingerlatsinermut akuliunneq ajormata. Kisiannili suleqatigiissitaliap sulinissaanut tunngavissiap ilagaa Royal Greenlandip nunaqarfinni tunisassiorfii aamma misissuiffiqineqassasut. Maannakkut matusineq imaluunniit ammaaneq pillugu oqaaseqarsinnaangilara, tassa suleqatigiissitaliap nalunaarusiaa pillugu Royal Greenlandip ulluinnarni aqutsisuinut oqaloqatigiinnissutigineqartussaassamat, Naalakkersuisut misissoreerpassuk.

Inussiarnersumik inuulluaqqusillunga



Finn Karlßen

Aalisarnermut, Piniarnermut Nunalerinermullu Naalakkersuisoq



24. marts 2009

Inatsisartut suleriaasiat § 36 imm. 1 naapertorlugu, apeqqut ataani allassimasoq Naalakkersuisunut saqqummiuppara.

Kangaatsiami, Ikerasaarsunni Niaqornaarsunnilu Royal Greenland-ip tunisassiorfiutaasa siunissaat pillugu Naalakkersuisut qanoq iluarsiinierlarsaarpas ?

(Inatsisartunut ilaasortaqaq Otto Jeremiassen, Siumut.)

Apeqqutit:

Aalisartunut innuttaasunullumi tamanut aningaasarsionnikkut suliffissaqarnikkullu isumalluutituaasut Kangaatsiami, Ikerasaarsunni Niaqornaarsunnilu Royal Greenland-ip tunisassiorfiutaasa maanna piffissami sivitsulersumi matuneqarnerminiit ullumikkumut suli qanoq iliortoqarniarnersoq paasissutissiissutigineqanngilaq, tamanna assut Kommuneqarfitsinni ilungersunartorsiorfitsivoq paattuugasitsillunilu, tassami aalisartut ulloq manna tikillungu aningaasarsiorfingisinnaasaannik ilumut qanoq ingerlariaqqittoqarniarnersoq allaat nalunarluni, inuillu pineqartut ullut atuuffiusut ingerlaneranni aningaasamik pisariaqartitsigaluttuinnarnerat malunnarsiarlorluni, tassami upernariartornera malillugu aalisakkallu takkussimaariartorneranni aalisartut piareersarnissaminut iliuseqarusukkaluarlutik qanoq pisoqarniarnersoq naalaaginnaleqqavaat:

- Tassami tunisassiorfiit pillugit suleqatigiisitaq suliaqartoq oqaatigineqartarpoq, taannalu qanoq sivisutigisumik ingerlanniarneqarnerpa ?
- Suut qanoq iliuusissat siunnerfiuppat ?
- Tunisassiorfiit matoqqatiinnarniarneqarpat, imaluunniit ammaqqinnissaat siunertaangaluarpa ? ullunimi makkunani suliffeqarfimmi atortut piarneqarlutik ilaat aallarartinneqarmata.
- Kiisalu tunisassiorfiit matuneqarnerisa kingunerisaanik sulisartut suliffeerupput,

Taamaammat § 36 imm. 1 naapertorlugu apeqquteqaat manna ingerlatippara, piaartumillu akineqarnissara neriuutigalugu.

Ikinngutinnersumik inuulluaqqusillunga

Inatsisartuni ilaasortaqaq

Otto Jeremiassen, Siumut